



Sarajevo, 27.11.2025. godine  
MEDIJIMA

**SAOPĆENJE ZA MEDIJE**  
**Održan deveti sastanak Pododbora za poljoprivredu i ribarstvo između EU i BiH**

Na devetom sastanku Pododbora za poljoprivredu i ribarstvo između Evropske unije i Bosne i Hercegovine, koji je održan 27.11.2025. godine putem videokonferencije, članovi dvije delegacije su razgovarali o postignutom napretku u ovoj oblasti i obavezama koje je potrebno ispuniti u narednom periodu.

Razmijenjeni su podaci o trgovini osnovnim i prerađenim poljoprivrednim proizvodima te ribom i ribljim proizvodima, kao i informacije vezane za poljoprivrednu politiku EU i događanja u poljoprivrednom sektoru BiH. Članovi bh. delegacije su zahvalili Evropskoj uniji na kontinuiranoj podršci i istakli zahtjev Evropskoj komisiji za proširenje kvote za izvoz kalifornijske pastrmke, kao i za dodjelu kvote za izvoz Livanjskog sira.

Na sastanku su prezentovani podaci o mjerama podrške bh. poljoprivredi i izвозnoj politici, kao i o trenutnom stanju kada je u pitanju izrada cjelodržavne strategije za poljoprivredu i ruralni razvoj. Od BiH se očekuje da harmonizuje mjere podrške poljoprivredi u cijeloj državi i postepeno ih uskladi s pravnom stečevinom EU, ažurira Strateški plan za ruralni razvoj i uspostavi institucionalnu koordinaciju u ovom sektoru. Delegacija BiH je informisala Evropsku komisiju i o aktivnostima na pripremi poljoprivrednog popisa i izradi poljoprivredne statistike. Potrebno je ubrzati pripreme, osigurati potrebna sredstva i zakonske preduslove te usvojiti Akcioni plan za pripremu, provođenje i diseminaciju rezultata popisa na nivou cijele države.

BiH, pored toga, mora unaprijediti administrativne kapacitete i resurse s ciljem bolje pripremljenosti i postepenog približavanja Zajedničkoj poljoprivrednoj politici EU (CAP), posebno u pogledu uspostave centralne agencije za plaćanja i Integrisanog administrativnog i kontrolnog sistema (IACS).

Na sastanku je bilo riječi i o izradi podzakonskih akata o organizaciji tržišta vina, zaštiti nacionalnih oznaka geografskog porijekla, kao i o pripremi i usvajanju zakona o organskoj proizvodnji na državnom nivou, koji trebaju biti usklađeni s propisima EU.

Evropska komisija je pozvala vlasti u BiH da uspostave pouzdan sistem registracije životinja, intenziviraju sistem praćenja i nadzora u kontroli bolesti životinja te nastave kampanje vakcinacije protiv bjesnila i bruceloze.

Članovi delegacije Evropske komisije su istakli da je od ključnog značaja usklađivanje propisa u oblasti sigurnosti hrane, veterinarstva i fitosanitarnih pitanja s pravnom stečevinom EU,

posebno kada su posrijedi zakoni o hrani, zdravlju životinja i bilja, kroz usvajanje zakonodavstva na nivou države, kao i dodatno jačanje institucionalnih i administrativnih kapaciteta, uključujući inspekcijske službe i referentne laboratorije.

Od BiH se očekuje i da nastavi s aktivnostima i informiše Komisiju o pripremi državne strategije za ribarstvo i akvakulturu i osnaži administrativne i finansijske kapacitete potrebne za provođenje ribarske politike i mjera.

Devetim sastankom Pododbora za poljoprivredu i ribarstvo između Evropske unije i Bosne i Hercegovine kopredsjedavali su pomoćnik ministra u Ministarstvu vanjske trgovine i ekonomskih odnosa BiH Slobodan Cvijanović i Heinke Veit iz Generalne uprave za proširenje i istočno susjedstvo (DG ENEST). O radu Pododbora vidi više na stranici Direkcije: <https://www.dei.gov.ba/bs/page-stabilization-agreement>.

Direkcija za evropske integracije